

ЎЗБЕКИСТОН РЕСПУБЛИКАСИ
ВАЗИРЛАР МАҲКАМАСИНИНГ
Қ А Р О Р И



ПОСТАНОВЛЕНИЕ
КАБИНЕТА МИНИСТРОВ
РЕСПУБЛИКИ УЗБЕКИСТАН

28 " февраль 2018 й. г. № 149

Тошкент ш. – г. Ташкент

**Қишлоқ хўжалигида бозор механизмларини
кенг жорий этиш чора-тадбирлари тўғрисида**

Ўзбекистон Республикаси Президентининг “Пахта хомашёси ва бошоқли дон экинлари етиштиришни молиялаштириш тизимини тубдан такомиллаштириш чора-тадбирлари тўғрисида” 2018 йил 28 февралдаги ПҚ-3574-сон қарори ижросини таъминлаш мақсадида Вазирлар Маҳкамаси **қарор қилади**:

1. Куйидагилар:

а) 2018 йил 1 мартдан бошлаб:

пахта хомашёсини навлар ва класслар бўйича харид қилиш учун давлат томонидан кафолатланган нархлар 1-иловага мувофиқ;

бошоқли дон экинларини навлар ва класслар бўйича харид қилиш учун давлат томонидан кафолатланган нархлар 2-иловага мувофиқ;

б) кейинчалик маблағларни “Агробанк” АТБ туман филиалларида жойлаштириш орқали Қорақалпоғистон Республикаси ва вилоятларда давлат томонидан харид қилинадиган 2018 йил ҳосили пахта хомашёсини етиштириш харажатларини молиялаштириш учун ажратиладиган кредит ресурсларини ҳудудлар, ойлар ва харажатлар турлари бўйича кафолатли тақсимлаш ҳажмлари 3-1-3-14 ва 4-1-4-14-иловаларга мувофиқ;

в) кейинчалик маблағларни “Агробанк” АТБ туман филиалларида жойлаштириш орқали Қорақалпоғистон Республикаси ва вилоятларда давлат томонидан харид қилинадиган 2018 йил бошоқли дон экинлари ҳосилини етиштириш харажатларини молиялаштириш учун ажратиладиган кредит ресурсларини ҳудудлар, ойлар ва харажатлар турлари бўйича кафолатли тақсимлаш ҳажмлари 5-1–5.14 ва 6-1–6-14-иловаларга мувофиқ тасдиқлансин.

Ўзбекистон Республикаси Бош вазирининг ўринбосарлари Ж.А.Қўчқоров ва З.Т.Мирзаевга Қорақалпоғистон Республикаси Вазирлар Кенгаши ва вилоятлар ҳокимликларининг таклифлари асосида кредит ресурсларининг тасдиқланган кафолатли ҳажмларига ўзгартиришлар киритиш ҳуқуқи берилсин.

2. Ўзбекистон Республикаси Молия вазирлиги, Қишлоқ хўжалиги вазирлиги, Молия вазирлиги ҳузуридаги Қишлоқ хўжалигини давлат томонидан қўллаб-қувватлаш жамғармаси (кейинги ўринларда Жамғарма деб аталади) “Ўзпахтасаноат” АЖ, “Ўздонмахсулот” АК, Қорақалпоғистон Республикаси Вазирлар Кенгаши ва вилоятлар ҳокимликлари билан биргаликда туманлар ҳокимликларига, “Агробанк” АТБга ва қишлоқ хўжалиги ишлаб чиқарувчиларига уч кун муддатда:

2018 йил ҳосили пахта хомашёсини ва бошоқли дон экинлари ҳосилини навлар ва класслар бўйича харид қилиш учун давлат томонидан кафолатланган нархларни;

кейинчалик маблағларни “Агробанк” АТБ туман филиалларида жойлаштириш орқали давлат томонидан харид қилинадиган 2018 йил ҳосили бўйича ойлар, вилоятлар ва туманларга бўлинган кредит ресурсларининг кафолатланган ҳажмларини маълумот учун етказсин.

3. 2018 йилнинг 1 мартидан бошлаб, минерал ўғитлар уларни ишлаб чиқарувчилар томонидан фақат биржа савдоларида қуйидаги шартларга риоя этган ҳолда (ички тармоқларга етказиб беришдан ташқари) сотилиши белгилаб қўйилсин:

биржа савдоларига қўйиладиган минерал ўғитларнинг бошланғич нархи рентабеллик ҳисобга олинган ҳолда ишлаб чиқарувчилар томонидан таннархнинг 10 фоизи миқдоридида шакллантирилиши (бошланғич нархни белгилашда Ўзбекистон Республикаси Ҳукуматининг кафолати билан жалб этилган кредитлар бўйича асосий қарзни қоплаш билан боғлиқ тўловлар ҳисобга олинади);

азот ва фосфор ўғитлар биржа савдоларига уларни ишлаб чиқарувчилар томонидан шакллантириладиган ва харидорлар тоифалари учун табақалаштирилган лотлар бўйича қўйилади. Бунда биржа савдоларига қишлоқ хўжалиги маҳсулотларини етиштирувчилар ва тадбиркорликнинг бошқа субъектлари, шунингдек, “Ўзагрокимёҳимоя” АЖ корхоналари учун йирик лотлар (битта лот бўйича 300 тоннадан ортиқ) ҳамда фақат қишлоқ хўжалиги маҳсулотларини етиштирувчилар учун майда лотлар (битта лот бўйича 5 тоннадан 70 тоннагача) қўйилади;

2018 йилнинг 1 мартидан 1 августигача охириги истеъмолчи бўлган қишлоқ хўжалиги маҳсулотларини етиштирувчиларга сотиладиган азот ва фосфор ўғитларининг нархи 7-иловага мувофиқ белгиланган чекланган нархлардан ошмаслиги зарур. Ушбу талабни бузган шахслар қонунчиликда белгиланган тартибда жавоб беради;

бошқа турдаги минерал ўғитлар очик биржа савдорларида барча тоифадаги харидорлар учун лотлар ҳажмлари чекланмаган ҳолда ва чекланган нархларсиз сотилади;

маҳаллий ишлаб чиқарувчилар томонидан тайёрланган ва ушбу бандга мувофиқ харид қилинган минерал ўғитлардан ўз эҳтиёжлар учун фойдаланилади ёки улар ички бозорда фақат қишлоқ хўжалиги маҳсулотлари етиштирувчиларга сотилиши мумкин.

Ўзбекистон Республикаси Бош вазирининг ўринбосари А.С.Султонов Ўзбекистон Республикаси Қишлоқ хўжалиги вазирлиги ва “Ўзкимёсаноат” АЖ билан биргаликда минерал ўғитларни ишлаб чиқарувчилар кесимида биржа савдоларига қўйишнинг ҳар ўн кунлик жадвалларини бир ҳафта муддатда тасдиқласин.

4. 2018 йилнинг 1 мартидан бошлаб, истеъмол солиғи ҳисобга олинган ҳолда тўғридан-тўғри шартномалар бўйича, шу жумладан қишлоқ хўжалиги маҳсулотлари етиштирувчиларга ва автомобилларга ёнилғи қуйиш шохобчаларига қуйидагилар учун ягона чакана нархлар белгилансин:

дизель ёнилғисига – бир литр учун 4600 сўм;

ЭКО дизель ёнилғисига – бир литр учун 4700 сўм.

“Ўзбекнефтгаз” АЖ янги чакана нархлар прејскурантларини уч кун муддатда барча манфаатдор вазирликлар, идоралар, корхоналар ва ташкилотларга етказсин.

5. “Ўзбекнефтгаз” АЖнинг:

фермер хўжаликларига хизмат кўрсатувчи автомобилларга ёнилғи куйиш шохобчаларини давлат-хусусий шериклик шартлари асосида тадбиркорлик субъектларига узоқ муддатли ижарага босқичма-босқич бериш ҳамда уларнинг кишлок хўжалиги маҳсулотлари етиштирувчиларига нефть маҳсулотларини сотиши;

фермер хўжаликларига хизмат кўрсатувчи ва узоқ муддатли ижарага берилган автомобилларга ёнилғи куйиш шохобчалари томонидан дизель ёнилғисини уларнинг ҳақиқий харажатлари ва рентабелликни таъминлашдан келиб чиққан ҳолда белгиланадиган чегирмалар ҳисобга олиниб, нефть базалари билан тўғридан-тўғри шартномалар бўйича белгиланган нархларда сотиб олиши тўғрисидаги таклифларига розилик берилсин.

6. Белгилаб қўйилсинки:

пахта хомашёси ва бошоқли дон етиштиришни молиялаштириш учун ойларга бўлинган кредит ресурсларининг кафолатланган ҳажми тегишли туман ҳокими томонидан Ўзбекистон фермер, деҳқон хўжаликлари ва томорқа ер эгалари туман кенгаши билан биргаликда агротехник тадбирлар (хариталар) асосида пахта хомашёси ҳамда бошоқли дон етиштирувчилар бўйича тасдиқланади;

тижорат банкларининг туманлар филиаллари пахта хомашёси ва бошоқли дон етиштиришни мақсадли молиялаштириш учун кредит линияларини контрактация шартномаси ҳамда кредит ресурсларининг тасдиқланган ва кафолатланган ҳажми асосида ҳар бир ишлаб чиқарувчи бўйича очади;

тижорат банкларининг туманлар филиалларига пахта хомашёси ҳамда бошоқли дон етиштирувчилар билан биргаликда кредит ресурсларининг тасдиқланган ва кафолатланган ойлик ҳажми доирасида молиялаштириш ҳажмлари ҳамда йўналишларига 15 фоизгача ўзгартиришлар киритиш ҳуқуқи берилади;

Жамғарма маблағлари тижорат банкларида пахта хомашёси ҳамда бошоқли дон етиштирувчиларга мақсадли кредит ажратиш учун йиллик 1 фоиз ставкаси бўйича 14 ойгача бўлган муддатга жойлаштирилади;

пахта хомашёси ҳамда бошоқли дон етиштирувчилар харид қилинадиган моддий-техник ресурслар (ўсимликларни кимёвий ҳимоя қилиш воситалари, минерал ўғитлар ва ёнилғи-мойлаш материаллари) учун олдиндан 100 фоиз тўлов тўлайдилар;

харид қилинган моддий-техник ресурслар тўлов тўлангандан кундан бошлаб беш кундан кечиктирмасдан етказиб берилади;

ажратилган кредит маблағларидан мақсадли фойдаланиш юзасидан тижорат банкларининг туманлар филиаллари томонидан мониторинг олиб борилади ва тижорат банкининг туман филиали раҳбари зиммасига мониторингнинг тегишли равишда олиб борилиши учун жавобгарлик юкланади;

давлат буюртмаси ҳажмлари бўйича пахта хомашёси ва бошоқли дон етиштиришни молиялаштиришга доир белгиланган механизмнинг фаолият кўрсатиши, ўзаро ҳисоб-китобларнинг ўз вақтида амалга оширилиши ва моддий-техник ресурсларнинг тўлиқ етказиб берилиши ҳамда хизматлар кўрсатилишини назорат

қилиш туман ҳокимининг биринчи ўринбосари ва Ўзбекистон Республикаси Молия вазирлигининг Давлат молиявий назорати бош бошқармасининг бириктирилган ходими зиммасига юкланади.

7. Қуйидагилар:

Пахта хомашёси ва бошоқли дон етиштириш харажатларини, шунингдек, пахта-тўқимачилик ишлаб чиқаришларини молиялаштириш тартиби тўғрисидаги низом 8-иловага мувофиқ;

пахта хомашёси ва бошоқли дон етиштирадиган фермер хўжаликлариغا кредит ажратиш схемаси 9-иловага мувофиқ;

пахта хомашёси ва бошоқли дон етиштирадиган фермер хўжаликларини дизель ёнилғиси билан таъминлаш схемаси 10-иловага мувофиқ;

пахта хомашёси ва бошоқли дон экинлари етиштирадиган фермер хўжаликларини минерал ўғитлар билан таъминлаш схемаси 11-иловага мувофиқ тасдиқлансин.

8. Ўзбекистон Республикаси Қишлоқ хўжалиги вазирлиги Иқтисодиёт вазирлиги ва Молия вазирлиги билан биргаликда пахта хомашёсини йиғиб-териб олиш босқичларига (мавсумларига) қараб, 2018 йил ҳосили пахта хомашёсини йиғиб-териб олиш учун тавсия этилаётган меҳнатга ҳақ тўлашнинг тариф ставкаларини 2018 йилнинг 1 августигача Ўзбекистон Республикаси Вазирлар Маҳкамасига тасдиқлаш учун киритсин.

9. Ўзбекистон Республикаси Молия вазирлиги биржа савдоларида минерал ўғитларни харид қилиш ва пахта хомашёси ҳамда бошоқли дон экинлари етиштирувчиларга етказиб бериш учун йиллик 3 фоиз ставка билан “Ўзагрокимёҳимоя” АЖга айланма маблағлар бўйича кредит ажратиш мақсадида “Агробанк” АТБга бир ҳафта муддатда 400 миллиард сўм миқдоридаги маблағларни йиллик 1 фоиз ставка билан депозитга жойлаштиришни таъминласин.

10. Ўзбекистон Республикаси Молия вазирлиги:

“Ўзагросуғурта” суғурта компанияси билан биргаликда жаҳон тажрибасини чуқур ўрганган ҳолда, қишлоқ хўжалиги экинлари ҳосилини суғурталаш механизмини такомиллаштиришга доир таклифларни бир ой муддатда ишлаб чиқсин ва Вазирлар Маҳкамасига киритсин;

пахта хомашёси ва бошоқли дон етиштирадиган фермер хўжаликларини молиялаштириш учун маблағлар вақтинча етишмаганда (касса узилишида) Жамғармага асосланган ҳисоб-китоблар бўйича бюджетдан фоизсиз ссуда ажратсин;

зарурат бўлганда, “Ўзнефтмахсулот” АЖга агротехника мавсумларидан келиб чиққан ҳолда, ёнилғи-мойлаш материаллари захирасини яратиш мақсадида четдан углеводород хомашёси олиб келиш учун бюджетдан ссуда ажратсин;

мақсадли маблағлар зарарқунандаларга қарши курашиш харажатларини қоплаш, шунингдек, фавқулодда вазиятларда ҳосилни сақлаб қолиш учун Қорақалпоғистон Республикаси бюджетига ва вилоятлар маҳаллий бюджетларига 12-иловага мувофиқ тақсимланишини таъминласин;

Ўзбекистон Республикаси Иқтисодиёт вазирлиги билан биргаликда ун ва нон нархининг кескин ошишига, жумладан, “Ўздонмахсулот” АК корхоналарининг бандлиги, штатлар сони, ташкилий тузилмасини оптималлаштириш орқали йўл қўймаслик юзасидан икки ой муддатда чоралар кўрсин.

Ўзбекистон Республикаси Бош вазирининг ўринбосари З.Т.Мирзаев, Қишлоқ хўжалиги вазири Б.Т.Юсупов, Қорақалпоғистон Республикаси Вазирлар Кенгаши Раиси, вилоятлар ва туманлар ҳокимликлари зиммасига ушбу бандда назарда тутилган тадбирларнинг ўз вақтида ва сифатли амалга оширилиши учун шахсий жавобгарлик юклансин.

11. Ўзбекистон Республикаси Ер ресурслари, геодезия, картография ва давлат кадастри давлат қўмитаси (А.Х.Абдуллаев), Қишлоқ хўжалиги вазирлиги (Б.Т.Юсупов) манфаатдор идоралар билан биргаликда 2018 йилнинг 1 октябригача экин майдонларини тўлиқ хатловдан ўтказсин ва экин майдонларининг умумий фойдаланиладиган электрон маълумотлар базасини яратишни назарда тутган ҳолда, экин майдонларининг балл бонитети бўйича маълумотлар базасини янгилаш чоратадбирлари дастурини Вазирлар Маҳкамасига тасдиқлаш учун киритсин.

12. Ўзбекистон Республикаси Молия вазирлиги тасдиқланган балл бонитетлар асосида балл бонитети 60 дан кам ва ҳосилдорлиги паст ерларда пахта хомашёси етиштирадиган фермер хўжалиklarини молиявий қўллаб-қувватлаш учун Давлат бюджетидан зарур маблағлар ажратилишини таъминласин.

13. **Ўзбекистон Республикаси Бош вазирининг ўринбосари – Молия вазири Ж.А.Кўчқоров, Қорақалпоғистон Республикаси Вазирлар Кенгаши Раиси, вилоятлар ва туманлар ҳокимларининг биринчи ўринбосарлари, тижорат банклари раҳбарлари зиммасига – пахта хомашёси ва бошоқли дон етиштиришни ўз вақтида молиялаштириш, фермер хўжалиklarининг маблағлардан мустақил ва ошқора фойдаланиши ҳамда уларни мақсадли йўналтириши, харид қилинадиган пахта хомашёси ва бошоқли дон бўйича жорий йил охиригача тўлиқ ҳажмда ўзаро ҳисоб-китоб қилиш учун манбалар шакллантирилиши;**

Ўзбекистон Республикаси Бош прокурорининг ўринбосари С.И.Самадов, Қорақалпоғистон Республикаси, вилоятлар ва туманлар прокурорлари зиммасига – хизмат кўрсатувчи ташкилотлар томонидан талон-тарож ва нархларни асосиз ошириш ҳолатларининг қатъий олдини олган ҳолда, минерал ўғитлар ва ёнилғи-мойлаш материаллари етказиб бериш бўйича шартнома мажбуриятлари бажарилишини назорат қилиш;

Ўзбекистон Республикаси Бош вазирининг ўринбосари – “Ўзагротехсаноатхолдинг” АЖ бошқаруви раиси Н.С.Отажонов, Қорақалпоғистон Республикаси Ички ишлар вазирининг ўринбосари ва вилоят ички ишлар бошқармалари, туман ички ишлар бўлимлари (бўлимлари) бошлиқлари зиммасига – Ўзбекистон Республикаси Президентининг 2018 йил 4 январдаги ПҚ-3459-сон қарори билан тасдиқланган қишлоқ хўжалиги техникасини 2018 йилнинг 15 апрелига қадар етказиб бериш, биринчи навбатдаги қишлоқ хўжалиги техникасини 2018 йилнинг I ярмида етказиб бериш, шунингдек, механизациялаштирилган хизматларни ўз вақтида кўрсатиш бўйича мақсадли параметрлар сўзсиз бажарилган ҳолда, зарур миқдордаги қишлоқ хўжалиги техникаси билан таъминлаш;

Ўзбекистон Республикаси Бош вазирининг ўринбосари – “Ўзбекнефтгаз” АЖ бошқаруви раиси А.С.Султонов зиммасига - фермер хўжалиklarининг ёнилғи-мойлаш материаллари билан ўз вақтида ва тўлиқ таъминланиши, белгиланган нархларни сақлаб туриш ҳамда фермер хўжалиklarини зарур миқдорда узлуксиз таъминлаш мақсадида қишлоқ хўжалигининг уч ойлик эҳтиёжни қоплайдиган захира ташкил этилиши;

Ўзбекистон Республикаси Хусусийлаштирилган корхоналарга кўмаклашиш ва рақобатни ривожлантириш давлат қўмитаси раиси Р.А.Гулямов, Ўзбекистон Республикаси Бош прокурорининг ўринбосари С.И.Самадов зиммасига – ушбу жараён иштирокчиларининг монопол ҳолатидан фойдаланган ҳолда нархларнинг асоссиз оширилишига йўл қўймаслик;

Ўзбекистон Республикаси Бош вазирининг ўринбосари З.Т.Мирзаев, Қишлоқ хўжалиги вазири Б.Т.Юсупов, Сув хўжалиги вазири Ш.Р.Ҳамраев, Қорақалпоғистон Республикаси Вазирлар Кенгаши Раиси, вилоятлар ва туманлар ҳокимлари зиммасига – ерларнинг мелиоратив ҳолатини яхшилаш ва унумдорлигини ошириш, пахта хомашёси ва бошоқли дон етиштиришнинг замонавий ҳамда ресурс тежайдиган технологияларини жорий қилиш, фермер хўжалиklarининг комплекс агротехник тадбирларни ўз вақтида ва сифатли бажариши;

Ўзбекистон Республикаси Бош вазирининг ўринбосари З.Т.Мирзаев, Қишлоқ хўжалиги вазири Б.Т.Юсупов, Молия вазирининг ўринбосари А.Р.Каримов, “Ўзагрокимёҳимоя” АЖ раиси У.А.Охунов, “Ўзкимёсаноат” АЖ бошқаруви раиси А.А.Абдуллаев, Қорақалпоғистон Республикаси Вазирлар Кенгаши Раиси, вилоятлар ва туманлар ҳокимлари зиммасига – фермер хўжалиklarининг ўсимликларни кимёвий ва биологик ҳимоя қилиш воситалари билан ўз вақтида таъминланиши, уларга ўсимликларни ҳимоя қилиш, зараркунандалар, ўсимликлар касалликлари ва ёввойи ўтларга қарши курашиш бўйича комплекс агрокимёвий хизматлар кўрсатилиши;

“Агробанк” АТБ раиси С.С.Хўжаев ва банк филиаллари раҳбарлари зиммасига – пахта хомашёси ва бошоқли дон етиштирувчиларга ўз вақтида кредит ажратилиши ҳамда товарлар (хизматлар, ишлар) етказиб берувчилар билан ўзаро ҳисоб-китобларни таъминлаш бўйича жавобгарлик юклансин.

14. Вазирликлар, идоралар, ҳуқуқни муҳофаза қилиш ва назорат қилувчи органлар, маҳаллий давлат ҳокимияти органлари раҳбарлари пахта ва дон етиштирадиган тадбиркорлик субъектлари ҳамда фермер хўжалиklarининг қонуний фаолиятига, куч, восита ва ресурслар жалб қилишига, уларнинг фаолияти билан боғлиқ бўлмаган тадбирлар учун жиноий жавобгарликка тортишгача бўлган жавобгарлик тўғрисида қатъий огоҳлантирилсин.

15. Қуйидагилар ўз кучини йўқотган деб ҳисоблансин:

Вазирлар Маҳкамасининг “Аммиакли селитрани ишлаб чиқариш, ташиш ва сотишни назорат қилишга доир қўшимча чора-тадбирлар тўғрисида” 2004 йил 30 апрелдаги 204-сон қарори;

Вазирлар Маҳкамасининг “Ёқилғи-энергетика ресурслари билан ўз вақтида таъминлаш бўйича қўшимча чора-тадбирлар тўғрисида” 2018 йил 14 ноябрдаги 913-сон қарори 1-бандининг бешинчи ва олтинчи хатбошилари.

16. Ўзбекистон Республикаси Молия вазирлиги бошқа манфаатдор вазирликлар ва идоралар билан биргаликда қонун ҳужжатларига ушбу қарордан келиб чиқадиган ўзгартириш ва қўшимчалар тўғрисида Ўзбекистон Республикаси Вазирлар Маҳкамасига икки ой муддатда таклифлар киритсин.

17. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари – Молия вазири Ж.А.Қўчқоров, Бош вазир ўринбосари З.Т.Мирзаев, Бош вазир ўринбосари – “Ўзбекнефтгаз” АЖ раиси А.С.Султонов зиммасига юклансин.

**Ўзбекистон Республикасининг
Бош вазири**



А.Арипов